



19. september 2019

UPA 2019/144-91  
Aqqalu C.Jerimiassen

**Uunga siunnersuut: Utoqqalinersiaqarneq pillugu Inatsisartut inatsisaata allanngortinnissaa pillugu Inatsisartut inatsisaat nr. xx, xx. xxx 2019-imeersoq. (Utoqqalinersianik ikilisitsisoqartinnagu aningaasanik innuttaasup akissarsiarisinnaasaanik qaffaaneg)**  
(Peqqissutsimut, Isumaginninnermut Inatsisinillu Atuutsitsinermut Naalakkersuisoq)

Inuk sulerusuttoq sulissaaq, assaat tamaasa atorfissaqartippagut!

Atassummiik nuannaajallannanngitsuunnigilaq maanna innuttaasut qitiutillugit suliaqarsimaneq takusinnaagatsigu, tassami sulerusukkaluanut ukiorpanni pillaasutullusooq pereerluta maanna kiisami oqaluinnalooriillarluta piviusunngoraluttualermat.

Ilami inuk suliuarsimasoq pinngitsaalillugulusooq angerlasimaffianut angerlartittuarnikuusimavarput utoqqalinermusiassaanic ilanngartuunneqassasoq siorasaartutullusooq illugu, illuanillu sullivinni arlalinni sulisussameeqaluta akileraarutitigullu isertassanik suli piunaqaluta.

Atassummiillumi nuannaarutiginnigitsuunnigilarput, kiisami akunnattumik isertitalikkormiut ukiorpanni nunatta aningaasiviisut illutik nammattuujarnikut oqilisaassiffiqineqartussanngussammata.

Oqaaseq nuannersunngulaarlugu taagaanni; utoqqartagut inuuttakkiartorput, pittorinneqqisaatinngiluatsiaannalersimallutik. Tassami ukiuni kingullerni ukiut 20-it kingumut eqqarsaatigissagaanni utoqqaanerusortarilikkagut peqqippasinneroqaat toqqaannarlugu taagaanni namminneq utoqqartarisimasaminniik. Taamaakkaluartorli, ukiorpaalunni kingullerni aningaasaqarnikkut ilanngartuussuarnikuusimanitta inuk pinngitsaalillugu suliuunnaarsissimagaangatsigu inuttut naleqassusaanussaaq innarliisinnaasarpoq, qanorlimi suli timi pisinnaasoq nalunagulu taamaalioqquneqarani pinngitsaaliissummik paarnaarussatullusooq misinnarsinnaassammata.

Atassummiik erseqqissumik imatut oqarusuppugut, qujanaq, ila qujanaq, una ersiutaavoq aqqummut siullermut ajunngitsumik aallariartulernermut. Assaat sulisinnaasut tamarmik sulissapput, inuk sulisinnaagallartilluni sulisinnaasutullu misigisimatilluni sulikuttoorniarli.

Utoqqartaqarpugulli aamma sulilluareersimallutik eqqissillutik utoqqalinersiaqartussanngortunik ulaperulukkunnaarnissaminnut aamma qilanaarnikunik. Paasilluarparpullu naak immaqa ilaasa uku oqaluuserineqarnerannut atatillugu sulinatik utoqqalinersiaqartut utoqqalinersiaasa appasissusaannik



oqariartuuteqarusuttunik. Uanili utoqqaat suli sulerusuttut pineqarmata annertunerusumik allat iserfigissanngikkallarpagut.

Immikkullu eqqaarusupparput imm. 91, Atassummiit Siverth K. Heilmann-ip siunnersuutaa tamakkiisumik aamma taperseratsigu. Tassanimi qulaajarneqassapput utoqqalinersiallit saniatigut sulinerminni ilannganneqartarnerisa tamakkiisumik peerneqartuuppata qanoq kinguneqassanersoq paasisariaqaratsigu.

Tamannalumi pillugu Atassummiik inatsisissatut siunnersuut imm.144, taavalu imm.91 tapersikuttoorlugit ataatsimiitsitaliamut susassaqartumut innersuukkusuppagut.